

pe spiritus veritatis in fide profienda est a Deo promissus, non erroris, atque mendacii. Non potest igitur Ecclesia errare in publico cultu ad religionem pertinente; adeoque quod colitur ab Ecclesia universa, id certo verum, & sanctum est.

Materialiter, inquiunt argutuli quidam, errare potest Ecclesia in fidei professione: nam professio fidei non est fidei definitio, cui nullus error subesse potest.

Sed isti dum ita disputant, cum Pontificis Maximi, & Ecclesiæ Catholice auctoritati plurimum detrahunt, tum, verbum Dei vel aperte negare, vel non satis percipere mihi videntur. Paulus ecce in priore ad Timotheum Epistola (a), cum discipulum suum monuisset officii, & quæ virtutes Episcopo dignæ, quid in grege pascendo opus esset ab eo fieri docuissest, ut scias, inquit hæc ab se scripta, quomodo te oporteat in domo Dei conversari, quæ est Ecclesia Dei vivi, columna, & firmamentum veritatis. Quasi dicat, hæc tibi scribo velut interpres Ecclesiæ, quæ veritatis est firmamentum, ejusque nomine tradò regulam morum, certissimam illam, & erroris immunem; quam si tenueris, salutem gregis, & tuam assequere. Quo enim pertinent ea verba, columna, & firmamentum veritatis, nisi ad illa, quibus ante docuerat, quomodo cum oporteret in domo Dei conversari, hoc est non solum credere, sed etiam, quæ fidei Christianæ perfectio est, rectissime vivere? Nullus igitur error cadere, potest in Pontificem Maximum, & Ecclesiam, cum facienda præscribit, & facit, quæ ad mores pertinent, atque aeternam salutem. Actus autem virtutum, ac religionis, quibus fidem Catholicam profitemur, pertinent sane ad aeternam salutem, & mores Christianos, quibus recte compositis illam consequimur. Ergo in iis præscribendis Ecclesia falli non potest. Quod si falli non potest, verissimum sit oportet eorum objectum. Lege caput integrum tertium ejus Epistolæ, quam citavimus, & ex toto sermone Pauli deprehendes, hic de moribus agi Episcoporum, ac ministrorum; quibus in infor-

(a) Cap. 3.

man-